

世德編序

古語曰桑梓維敬出入必望里而下馬何哉蓋尊敬其祖先杖屨之地也况先世遺傳詩若文奚啻桑梓尊敬之比也哉恭惟我先祖琴軒先生諱方澤諡靖肅麗季名臣也自在童年志存經學璿璣之幹洛龜之理無不精通恭讓朝以遺逸除檢校中樞院副使兼判書雲觀事逮李朝以星度改紀之勳 賜佐命一等功臣錄券封瑞山君不受遜於松京鷲嶺山終是不事二之高義也長男樗亭先生官吏判大提學諱伯濡諡文靖以經明行高洪武四年辛亥選貢舉與金朴兩學士赴中朝大鳴以還逮太宗朝召先生以吏判大提學不就乃語禮官曰一身二君非人道既知其非義雖強使之亦不可奪太宗歎曰父曾改紀自效陳範殷賓而其子伯濡又不以自辱柳伯濡家寧可師之不可以臣鳴呼兩世道德文章忠義節行之著於詩文者不爲不多而剗劓之役先世未遑兵燹累度世代侵遠焚湯也散逸也存者幾希後孫飲恨久矣而歲赤蛇春之殷以譜單整釐事轉到龍城日省堂先祖祭室洞其弓藏齋則優肅留在不多

日閱覽乙卯草單搜得遺墨若干篇乃是先祖兩先生手澤也而尊敬也愛慕也日欲常在手欲不釋期圖永世不朽而仍收衆心則咸曰登梓可也編名世德可也永鈺輩非但不能遠體近述而在父兄之事惟不能推也如此而豈敢曰善述乎哉謹奉僉宗之勤教不敢以不文辭而爲序如右而思菴先生詩律則載在行狀之末於義甚未安俾刊于此葆川龍湫慵齋諸公文章節義之著於詩文者雖是不多不可湮沒無傳附于篇末

歲屠維大荒落上章敦牂之月 後孫永鈺謹序

一行而爲百世典型者有之一身而爲鼓舞斯文者有之其惟我先祖琴軒樵亭兩先生之節義文德足以俟百不惑質神無疑之謂哉噫琴軒先生以麗朝舊臣矢志罔僕而推步星紀鄭郊隱宋性潭宋剛齋諸先生皆擬之於陳範而備悉乎狀序也曹梅溪權梅軒亦氣節底人而相與唱酬莫非艷頌節義之詞也然第觀望田橫島詩則字字凜冽有髮豎膽裂廉頑立儒之氣像固不待諸賢之說而知其爲百世之典型也長嗣樗亭先生篤生名門熏業于牧隱之門

慨然有回狂瀾裨世教之志勸諭守宰興復序庠獎進後生振勵士風使質質
遐鄙變成鄒魯傳所謂君子所過者化所存者神誠不可誣也東學之配賸松
谷之並享雖出於千古不易之公議而惟此文獻之脫遺於焚蕩散逸之餘者
直不過什數篇非徒雲仍之歆恨茹痛乃是世教之一大欠典也爰輯兩先生
之遺文及思菴先生之詩律合成一册名之曰世德編嗚呼吾道之否泰其必
有關於運化而斯集之完壽奄在於群邪縱橫倫綱掃地之會則得不爲吾道
之一碩果也哉

後孫寅東 謹序